

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1382 del 19/05/2026

An perkùrs zbisnen kunst un psikanàlise abezodekha di zboa protagonistn vodar zimbar kultùr un bazzaz hãm hintargelatt. Di auzstèllom tüat offe an sunta 24 von madjo di 15.30 in tages

“Laüt vo Lusérn”: in Museo Lusérn a naüga auzstèllom, boda redet von Rheo Martìn von Padrèzz un von Elvio Fachinelli

[Cimbro] An sunta 24 von madjo di 15.30 in tages dar Museo Lusérn tüat offe da naüge auzstèllom “Laüt vo Lusérn” a prodjèkht vürgetrakk von Kulturinstitut Lusérn, boda redet von zboan bichtegen figùrn vodar kulturàlege stòrdja vo Lusérn: dar kunstlar Rheo Martìn von Padrèzz un dar psikanalist Elvio Fachinelli. Auzgelekk affon vünfte piàno von Museo, a platz boda vo hërta khint genützt vor di groazan auzlegungen vo anìaglaz djar, di auzstèllom bill gem bèrt in zboa laüt, boda, siànka azza hãm gearbatet in zboa getoalte beraich, boda bintsche hãm zo tüana ummadar pinn àndar, hãm provàrt zo khenna pezzar in pànt zbisnen mentsch, kamòuschaft un kulturàlege identitét, lazzante hintar eppaz pittnan groazan menschlichen un inteletuàlegen bèrt.

Dar perkùrs geat nã in zboa sektzióngen. Da earst redet von Rheo Martìn von Padrèzz un stèllt vür di pildar von kunstlar, gelekk nãmp in sèlln von groazan künstlar von ‘900, boda hãm gehatt an ainfluss aftz imen. Di auzlegom bart soìn geraichart von panèln in drai zungen: azpe biar, belesch un taütsch, pildar von arkìf un video, boda kontàrn mearar von kontèst, bosa soìn gebortet un vodar kunst vodar figùr.

Da zboate sektzióng bart soìn vor in Elvio Fachinelli. Durch a zait-perkùrs, sachandar von arkìf, pildar, video un originàlege dokumèntn un fòldje vodar zait, dar pesuchar mage darvérn mearar von kunstlar, von bichtegarstn pildarn un von ainfluss bosa hãm gehatt atti gedénkhan vodar zait. Di auzlegom provàrt o zo spiegara di malamentrarstn pensiare von kunstlar, drinnvàngante di pesüachar in a tiavez geleba.

Zo spèrra in prodjèkht barta soìn a vollar progråmm trèff. Allz bazta àgeat in Pedrazza bart khemmen geschribet in an katalóg von kunst-stòrische Lorenzo Ferrarese, ummadar von kuratòrn vodar auzlegom pittnàndar pittar Elena Nicolussi Giacomaz un Maura Bello. Dise gedénkhan bartn khemmen vürgestèllt dar kamòuschaft an vraitã 29 von madjo di 20.30 datz abas in setz von Kulturinstitut Lusérn o, inan abastrèff boda bart àgian in groazan künstlar von ‘900, boda hãm gehatt ainfluss affon Pedrazza.

’Z bartnda khemmen gemacht o mearare trèff zo reda von Elvio Fachinelli, pitt studjös un bizzar vo meararnen bichtegen schualn un universitètn. Dar earst trèff bartze haltn atz 27 von prachant 2026 di 17.00 in tages pitt Gianluca Solla, protagonist vo “La magia del disegno: quando le immagini curano”. Darnã barta soìn dar trèff pinn Gioele Cima, boda bart trang a gedénkha pinn titl “L’importante è che se ne parli? Fachinelli e il futuro della salute mentale”. Atz 11 von höbiat 2026 di 17.00 in tages barta soìn dar Pietro Barbetta pinn trèff “Il desiderio dissidente in Elvio Fachinelli”, boda bart ren vo fraihait, vo Unbewusste un vodar soziàl-kritik in di psikanàlise. ’Z spèrrta dar trèff gehaltet vodar Erica Ferrario, an sãntzta 5 von herbestmånat di 17.00 in tages pinn titl vo “Elvio Fachinelli e l’asilo autogestito di Porta Ticinese a Milano” un von Sergio Benvenuto, atz 12 vo herbestmånat hërta di 17.00 in tages pitt “Fachinelli: fidarsi

dell'incoscio". Di trèff bartn soin durchgevüart vodar STAP, Società Trentina Altoatesina di Psicoanalisi, da bartn soin offe vor alle un bartn o soin an okkasióng zo vortiava bazzaz hatt hintargelatt dar Fachinelli durch mearare perspektiven.

Di auzstèllom "Laüt vo Lusérn" bart soin offe alle tage von 24 von madjo fin atz 31 von bimmat 2026 in Museo Lusérn. Zo bizzasan mearar makma gian atti websait www.lusern.it, atti social von Kulturinstitut odar ârüavan in 0464789645.

Übarsetzt von Kulturinstitut Lusérn

(eng)